

古來上聖 口口相傳 若修此法 入聖昇天

鍊丹呪

穩穩神居 綿綿洞虛 冬後一節 溫養吾珠
九蟲盡去 三尸速除 元神奉我 願賜天符
胎靈神化 妙達虛元 太上勅攝
急急如律令

太清元極至妙神珠玉類經

天老神光經表

薄

臣聞人不見形憑諸水鑑事不可預明其符
兆著灼是虛尚假精意水鑑雖徹資其自成
故形以目窺而見微兆以識察而觀妙斯事
畢舉孰可傲之如有一闕則難依據臣性識
愚劣藝術淺薄既於異書頗知至要只如目
前者定近遠察是非辨青黃知善惡上觀乾
象中測人情下鑒坤維斯等莫不皆由目中
光也若能見之戰聞出軍涉水陸即目下悉
黑若光去目患難立至則上不能見輔星中
不能辨親疎下不能觀萬物此神光去矣其
不觀斯妙臨患之時夫何悞哉頗有云為兼
以昏晦若能存神光於目皆察輔星於武曲
則不勞著灼休咎預分未接兵戈前知勝負
其文省而易教其理精而易通固可以去危
就安轉禍為福是知高祖心動卒免迫人之
謀趙襄馬驚懸知刺客之狀古來賢哲皆宗
師曠晉平張良受黃石之要此乃傳行世代
歷載既深文字或謬語有其繁巨竊不自揆
輒次之以此成一軸號曰天老神光謹進於

闕庭臣熟知陛下聖慮明暢妙理精道然臣
今敢聞以繁聽覽臣恐陛下以此微細不納
宸衷臣之愚直實以為保護聖躬莫不至斯
道危難之代實以保身臨事便知吉凶固詳
察不鄙為差無任忠懇之誠謹冒死奉表謹
獻以聞臣誠惶誠恐死罪死罪謹言

貞觀七年月日右僕射衛國公臣李靖
上表